

Saeh Angq Bi Lungz

□ Guj Gyah / 古佳

Soengq bae bi duzdoq(douq),
Bimoq duzlungz mbin,
Doeng bae coux seizcin,
Bouxbox sim raeujrub.

Soengq bae bi duzdoq(douq),
Bimoq duzlungz fan,
Fouqgviq soengq daengz ranz,
sim vunz van lumj oij.

Ndwenngoenz lumj raemx lae,
Ngoenzhwnz bae mbouj dauq,
Roegcin mbin daeuj bauq,
Lungz daeuj bauj bingzan.

Ndwenngoenz lae lumj raemx,
Raeuz gaemh de mbouj dingz,
Bi duzlungz haidin,
Lumj vacin hai moq.

Bi duzlungz haidin,
Lumj vacin hai moq,
Gou miz haujlai goj,
Doq fwen lwnh daihgya.

Goeng bohlungz ranzlaj,
Gaj mou hung gvaq cieng,
De naeuz de ciengx yiengz,
Ngaenz rim sieng rim gyih.

Ndwencieng gaj mou hung,
Hoh bi lungz an'onj,
Ciengx yiengz mbouj siedbonj,
Gij ndei gyonj hawj de.

Rumzraeuj daengz vivaek,
Rumzbaek ngamq baema,
Goeng'au daengz ndaw naz,
Vid genga vanq bwnh.

Goeng'au miz simgei,
Ciengx nonsei ndaej canh,
Bi sou geijcib fanh,
De naeuz you ganq cin.

Daeg godangz ranzgwnz,
Okhwnz rej bauqciengh,
De rox guh rox siengj,
Dajciengx youh dajndaem.

De ngamq cawx ci moq,
Hai daengz laj roq ce,
Bouxgeq riuhehe,
Lwgnyez rej bauq hoh.

Daeg nuengxdangz ranzgyang,
Dang bing ngamq doxdaug,
Miz caiz youh baenz mbauq,
Bauj guekgya bingzan.

Vih guekgya ok rengz,
Bouxseug neix miznaj,
Bi lungz de coux yah,
Lajdeih bouxboux riu.

Yamq haeuj bi duzlungz,
Ceifung dienhvah daeuj,
Ranz de yaek guh laeuj,
Cingj raeuz gvaqbae gwn.

Ceifung youq ndawrungh,
Ciengx gungq youh ciengx baeu,
Bi lungz cawx ranzlaeuz,
Heuh raeuz bae goenghoh.

Coh de heuh Daegcau,
Bau reihnaz ndaem oij,
Yungh gihgai hai coi,
Noix haujlai goengrengz.

Reih oij heunaunau,
Sau mbauq sing fwen sang,
Raemj oij bae caux dangz,
Gwn ciengx ndang hohmingh.

Lajmbanj saeh ndei lai,
Baedauq nai mbouj liux,
Raeuz caiq haeuj singz yiuq(yawj),
Ciuh neix ndei mbouj ndei.

ndawsingz bienqvaq lai,
Gunghcangj baiz rim dieg,
Ci baedauq vuebvueb,
Buet ngoenz laep ngoenz haemh.

Cingsaenz Dangj daiq loh,
Bouxcoz haenq guhhong,
Sing go yiengj lumj gyong,
Boux guhhong sim'angq.

Gangj daengz raeuz Gvangjsih,
Lohloh cungj mizmingz,
Gunghcangj youq ndawsingz,
Ndaem ciengx ning(nauh) lajmbanj.

Mwngz yawj ndaw gunghcangj,
Lwgmbauq ganq dajbau,
Mwngz yawj gyoengq lwgsau,
Bouxbox mbouj lau hoj.

Byaekheu ndaem ndaw diengz,
Ciengx mou mbouj dai raq,
Doxgaiq miz daihbaj,
Onjsim gvaq ndwenngoenz.

Siz Ginbingz cujsiz,
Miz sim daeuj daiq loh,
Mbouj hawj raeuz gungzhøj,
Guekcoj cij bingzan.

De daeuj daengz Gvangjsih,
Vix raeuz byaij baenaj,
Baihgwngz daengz baihlaj,
Vah coenzcoenz son doh.

Daj baezneix baenaj,
Raeuz geiq vah cujsiz,
Yaek fatcaiz baenzmiz,
Guh ndi(nde) doxgiet gonq.

Ndwenngoenz lumj raemx lae,
Hwnzngoenz bae mbouj dauq,
Bi duzlungz daeuj bauq,
Mbouj ndaej lauq ciuh vunz.

Bi lungz ngamq haidaeuz,
Saeh ndei gangj mbouj caez,
Daj baezneix doxbae,
Daengx vunz ndei gvaq ciuh.

Daengngoenz Baihdoeng Mbouj Rox Doek

—Cimh Riz Bak Bi Cungguk Gungcanjdangj

□ Cingh Swmungz / 清似蒙

Doengh boux dungxaej soh,
Mbouj rox dwg yaemmaeuz,
Bouxwix ciengj guhdaeuz,
De maedmaeuz hengzyak.

Caemh doih mbouj doxhuz,
“Cunghsanh” ruz oksaeh,
Guh dangjvu cingjeix,
Saed ra saeh hawj vunz.

“Seiq·it ngeih” saehgienh,
Roengzlingh luenh gaj vunz,
Ciengj Gaisiz cw mbwn,
Lwnh vunz naeuz “cingdangj”.

Boux daiqdoih mbouj gvai,
Ep vunzlai gyau cungq,
Giuhcazdui(纠察队) fwngzhoengq,

Yienghyienh soengq hawj vunz.

“Caet·it haj” cwngben,
Bakcungq cienq dauqlaeng,
Doxgap bienq doxcaengz,
Baengzyoux baenz vunzdig.

Ningz Han ginhcizdonz,
Song gonz gyonj ndaej rap,
Song nga dah doxgap,
Raemxrongz cakhumhum.

“Ningznyienh gaj baenz sauh,
Mbouj hawj lauq saek vunz”,
Vangh Cinghvei gaemz rumz,
Cienfanh vunz deng nanh.

Fanjdung vanzyanghdonz,

Ngonz ndaej cinj hingzseiq,
Buekluenh gaj nungzvei,
Mok laep deih laep mbwn.

2. Dawz Cungq Ok Cwnggenz

Caez bae guh seng'eiq,
Hujgeiq gag doxmaeuz,
Fanjdungbai dang daeuz,
Naeuz yaek mied Gungdangj.

Ya Mingzhan(夏明翰) maenhndei,
Deng lwed lae vut mingh,
Doengxhwnz mbouj bingzcingh,
Ndiusingj cienfanh vunz.

Raemj gvauej mbouj youqgaenj,
Caenh aeu byaij deng roen,
Dai bae mbouj doek hoenz,

Lij miz vunz gaen daeuj.

Go'nywj mbouj lau feiz,
Seizcin youh dauq maj,
Gofaex mbouj lau cax,
Raemj gvaq ngaz lij biu.

Gyoengq Gungcanj Gozci,
Guh cijsi lwnh naeuz,
Rek souhringz gaenq saeu,
Donq caeuz linghvaih cawj.

Raen hingzseiq mbouj doengz,
Dangj roengzfwngz gaijcu,
Danggya vuenh vunz guh,
Hainduj naemj caux bing.